

摘藻堂四庫全書薈要

集部

欽定四庫全書薈要

集部

御選宋詩卷

三十一

詳校官原任主事

李斯咏



欽定四庫全書薈要卷一萬八千三百三十七

集部

御選宋詩卷三十

七言古詩六

張耒

宿譙東逆旅夜聞歌白公琵琶行

元和才子悲流落一聽琵琶謂天樂青山裛淚作長歌  
誰取篇章和宮角譙東夜久行人稀卧聞此歌歌者誰  
歌似舊時人不見舉頭欲聽淚雙垂畫堂青瑣春無事



幾聽此歌還幾醉東風桃李作黃埃寶篋塵昏譜間字  
一聲一聽一情傷未老應知幾斷腸輾轉曲終燈燼落  
荒城寒月夜飛霜

別梅

宦遊到處即為家況我遷謫來天涯三年假館主人屋  
忽忽屢見新梅花那知今冬當去此十月已見凌霜葩  
繞之百匝未易別對我脈脈如含嗟懸知客去門復掩  
亭沼人散啼昏鴉朝風吹香散寂歷夜月照影低橫斜

嗟我明年復何處東州旱野連桑麻相思時有夢魂到  
極目南望空煙霞

題江州琵琶亭

危亭古榜名琵琶尚有楓林連荻花嗚呼司馬則已矣  
行人往來皆歎嗟司馬風流映千古當日歌詞傳樂府  
江山寂寞三百年潯陽風月知誰主我今單舸泛江潭  
往來略已遍東南可憐千里傷春眼不待琵琶淚滿衫  
將至嶺下作

竟陵南風稻新熟夢澤悠悠傷遠目春風嶺上望齊安  
太皞城邊攬秋菊那知歲暮東州客太山蒼寒晚霜白  
雲收霧捲日月明却上天衢瞻玉色敝裘瘦馬古道長  
九旬刺史歸空囊歸去故人應笑我滿衫清淚說潯陽

謝黃師是惠碧甃枕

鞏人作枕堅且青故人贈我消炎蒸持之入室涼風生  
腦寒髮冷泥丸驚夢入瑤都碧玉城仙翁支頤飯未成  
鶴鳴月高夜三更報秋不勞桐葉聲我老耽書睡苦輕

遶牀惟有書縱橫不如華堂伴玉屏寶鈿敲斜雲髻傾  
聞蛩有感

遙夜飛螢動秋思獨卧空山驚晚歲可堪六月已聞蛩  
日暮呶呶響庭際關河多風氣蕭索碧樹先秋早搖落  
鳴機夜織常怨寒白紵吳衫苦輕薄年年促織誰最悲  
堂上美人愁翠睂清砧搗練對殘月玉筍啼紅裁遠衣  
唐風詩人勸其主行邁苦遲嗟歲暮山城聽汝已三年  
三年白髮多於故飄飄秋夢到江湖我欲東歸鱸碧鱸

安能為爾將雙淚歲歲風前沾客裾

不寐

荒亭雨多秋草侵秋蛩相語秋夜深草蟲暗飛羽格磔  
星河影高天淡白騷人多懷夜不眠老松微吟風颯然  
山川浩蕩何日還晚空漫漫白露寒

對蓮花戲寄晁應之

平池碧玉秋波瑩綠雲擁扇青瑤柄水宮仙女鬪新妝  
輕步凌波踏明鏡彩橋下有雙鴛戲曾託鴛鴦問深意



半開微斂竟無言  
裊露微微灑秋淚  
晁郎神仙好風格  
須遣仙娥伴仙客  
人間萬事苦參差  
歎盡清香不來摘  
上元日早起贈同遊者

夜來人散殘更月  
曉陌空存舊車轍  
彩燈城市已春風  
寒木人家猶臘雪  
強起相逢酒未醒  
殘膏宿火尚熒熒  
歸來更拂障泥錦  
重約黃昏信馬行

東方

東方未明更五鼓  
星河寥寥寒雁度  
鐺鐺鳴鐸誰家車

陌上驅牛輾霜去北風吹面足踏冰邨南早飯天未明  
年年輸稅洛陽城慎莫後期官有刑

寒蟲

寒蛩振翼聲騷騷夜深月影在蓬蒿老人雖眠睫不交  
愁窗人寂燈無膏荒城鳴金睥睨高北斗下挹西江濤  
悲笳三奏老雞號晨光出山開沈寥

贈翟公巽

我昔出守來丹陽江流五月如探湯使君之居在山腹

繞舍樹石何青蒼千年藥根蟠井底靈液浸灌通寒漿  
人言枸杞精變狗夜吠往往聞空廊金山蕩滴浪花裏  
一舸遙去隨漁郎最奇巖齋人迹少乳水時滴白石牀  
翠黿坡陀負日色白鱉掀舞占風祥我留金山凡十日  
窮探力取無遺忘南風吹我渡江去已厭淮南塵土黃  
二十年間多少事身如疲馬起復僵淮南窮棲衆人後  
朝食不充藜莧腸公來衰顏得一笑側聽高論驚尋常  
窮閭過我坐至暮滿懷珠玉無粃糠乃知世間有清議

未可盡以己意量精金白璧天所寶理無破碎委道旁  
半年耳冷不聞此遇公矍然神激昂論交自顧已老醜  
從事理絕隨飛翔斯文有屬不但爾因公作詩我涕滂

東園

堂中晏坐不妄出堂外青春去如失小園十步綠如雲  
一時桃李事已畢猶殘酴醾數朵在未覺塵沙汙玉質  
金沙格俗終可憐膩白嬌紅如欲滴老夫睡起聽山禽  
竹間林外紛嘲嘖筍生漸愜子猷願梅熟未邀朱老喫

翻書只作引睡具傾壺屢進忘憂物今春風雨稍依節  
上田麥穗過數尺但知洗眼看世塗莫厭終年守蓬蓽  
送翟公巽赴中書舍人

韓筋柳骨世不聞翟公筆力回千鈞十年聲名滿四海  
淮陽邂逅雙朱輪老翁空疎亦何有察公於我意甚真  
高談亶亶雲漢上一埽闌葺如灰塵夜光明月不計數  
坐使衰敝生精神恨無金玉相報答還家三歎嗟我貧  
青燈論文夜未分曉聞門外送使君問君舍此去安往

紫皇詔歸侍玉宸鋒鋌發硯斷犀象好為明主裁絲綸  
論思獻納乃其職况公之意常在民追還三代舊風采  
主以事實致此文聖君賢相有美意筆端與物為陽春  
和楊念三自武昌至京師

三年別我入荊州一日長安從我遊愛君詩有春草句  
使我神遊黃鶴樓江山望爾欲穿眼見我驚嗟秋鵠短  
扁舟可辦吾欲東年來五湖魂夢中

偶書

秋陰漫漫幾千里赤壁磯前天接水連檣接柁不復行  
老魚擘波時出戲黃橙紫栗收如積青錢買酒不堪惜  
北人歲久厭南餐山邊有路何時還

窮秋晝夜陰如一夜不見星朝蔽日枯疇已獲大野空  
怒江未落連洲沒長魚撥刺不受釣漁子高眠守蓬蓽  
紫髯舊宮誰復遊鼎峙雄心久蕭瑟

東海有大松土人相傳三代時物其狀偉異詩  
不能盡因讀徐仲車五花柳枝之作作此詩以

激之

詩翁愛花復愛柳長歌高吟半酣酒自言二物天下奇  
愛之不厭形於詩嗟余所愛翁未見我昔東遊窮海甸  
波濤四絕大島中上有太古不死之長松千人裨延坐  
其下仰見翠葉迷蒼穹巨鼇竭力負不起鵬棲僅借舁  
枝容人言海東此其圉鱗甲百萬屯蛟龍又言海怪久  
不死守護山麓蟠其躬天空海闊風力壯敲憂簸蕩聲  
無窮軒轅張樂奏未已筍簾百萬喧笙鏞鬼神不欲人



屢見護以萬疊青山峰愛之未免困寂寞坐見雨露霑  
蒿蓬東皋吟翁天下才海嶽秀氣天所鍾豈惟文章繼  
騷雅胸中事業窺夔龍如何坎軻滯茅屋失所應與茲  
松同詩翁勿愛花與柳軟弱但解爭纖穠春英零落化  
為土夏葉狼籍工巢蟲嬌兒姍婦最入眼丈夫所志當  
英雄何當與君涉海去結茅松下甘長終

讀蘇子瞻韓幹馬圖

我雖不見韓幹馬一讀公詩如見者韓生畫馬常苦肥

肉中藏骨以為奇開元有臣善司牧四十萬匹屯山谷  
養之罕用食之豐力不曾施空長肉韓生圖像無乃然  
我謂韓生巧未全君不見昔時騏驥人未得飢守鹽車  
惟有骨昂藏不受塵土侵伯樂未來空佇立騏驥乏食  
肉常臞韓生不寫瘦馬駒誰能為驥傳之圖不如凡馬  
飽青芻

遊楚州天慶觀觀高道士琴碁

顏垣蒼蒼鎖喬木草滿荒田不容足壞簷破壁秋雨餘

蛛網蕭蕭風滿屋黃衣道人出迎客野態生疎脫拘束  
圍碁靜埽一堂空烹茶旋煮新泉熟彈琴對客客卧聽  
脫耳泠泠三四曲離騷幽怨松風悲流水潺湲履霜哭  
日斜攜手步空廊鳴鳩相呼竹間宿黃昏閉門人語絕  
空殿幽幽掩微燭我生資身最淡薄每厭煩歎幸幽獨  
何當不踏朝市塵長伴高人種松竹

海州道中

孤舟夜行秋水廣秋風滿帆不搖槳荒田寂寂無人聲

三尺跳魚翻水響河邊守罾茅作屋罾頭月明人夜宿  
船中客覺天未明誰家鞭牛登隴耕

秋夜蒼蒼秋日黃黃蒿滿田蒼耳長草蟲呶呶鳴復咽  
一夜雨多水滿輟渡頭鳴春邨徑斜悠悠小蝶飛豆花  
逃屋無人草滿家累累秋蔓懸寒瓜

送劉季孫守隰州

君家將軍本縫掖叱咤西摧賀蘭石一時成敗何足論  
要使英名飛竹帛劉君奇骨尚虎頭白須千騎守邊州

插架萬籤供記覽探囊五字擅風流大河之東士精勇  
日飲不妨飛獵韉五更吹角建牙旗萬馬合圍行酒甕  
朝裘風勁黑貂煖夜帳雪滿青氊重樂哉閉口莫言兵  
雖有頗牧誰能用

北原

秋風日夜吹北原北原秋蕪不復繁紫紆一徑漸可躡  
步踏落葉披榛莞蕭蕭九月草木變獨有修竹猶禁寒  
青紅野實不可辨晚日照射霜榴殷巉巉女几更清瘦

崖壁刻削無雲煙  
潦收石出洛水好  
靜夜到耳聲潺潺  
原西古城有微路  
禾黍索索荒涼田  
人家歲熟婦子樂  
邨巷日暖牛羊閒  
登臨嗟我幸無事  
況有美酒供開顏  
射麋獵兔可卒歲  
棄擲萬累休嗟歎

九月十二日入南山  
憇一民舍冒雨炙衣久之  
石稜如刀不容步上  
挽垂藤下無路風寒  
雨滑徒旅愁  
捨馬杖藜泥沒屨  
躋攀顛墜不容髮  
目眩心寒驚反顧  
亦知垂堂有遺戒  
身仰微官欲誰愬  
蕭蕭茅屋映絕壁

門外澗澗清泉注解衣就火不能暖旋拾山薪伐溪樹  
山翁生未食醯醢脫粟寒蔬度朝暮人間平地固不少  
何用巖嶇守磨兔秋聲四起山靄夕壞屋疎籬睡無處  
披裘結束相勸歸過盡重雲下山去

離泗州

舸舫大艚來何州翩翩五兩在船頭淮邊落帆汴口宿  
橋下連檣南與北南來北去何時停春水春風相送迎  
沙岸飛鷗舊相見短亭楊柳不無情清歌一曲主人酒

主人壽客客舉手明日酒醒船鼓鳴沙邊破堠不知名  
行人十里一回首雲邊猶有塔亭亭

淮陰阻雨

檣竿日日春風轉渺渺孤舟數家縣朝來雨暗隔淮邨  
白浪卷沙吹斷岸渡頭楊柳濕青青橋下涓涓野水生  
滿尺白魚初受釣斷行歸雁故能鳴平生行止任遲速  
蓬底欠伸朝睡足從來江海有前約老去塵埃無可欲  
曉天暖日生波光桃杏家家半出牆春日春波好相待



短帆輕櫓底須忙

田家

社南邨酒白如錫鄰翁宰牛鄰嫗烹插花野婦抱兒至  
曳杖老翁扶背行淋漓醉飽不知夜裸股掣肘時謹爭  
去年百金易斗粟豐歲一飲君無輕

秋風

秋風蕭蕭洛川波水碧沙寒飛白鷺波頭伐木欲成梁  
落日樵蘇下山去山頭九月雪一尺山民然薪當襦袴

石田收薄婦子飢歲晚苦寒安可度

秋風蕭蕭吹野桑田家禾黍初登場雉肥兔飽鷹隼健  
水落沙冷魚龍藏長淮煙波渺萬里悵望搔首山川長  
二年薇蕨苦不飽長安裘馬多輝光

感春

我昨西來到昌谷主人致酒留我宿坐中年少美如玉  
高歌清歡春夜促還家病酒對殘春東風落花吹滿屋  
出無與語歸閉門安得萬里馳吾足

陳師道

次韻蘇公西湖徙魚三首

錄二首

窮秋積雨不破塊  
霜落西湖露沙背  
大魚泥蟠小魚樂  
高丘覆杯水如帶  
魚龍不作搖尾憐  
公寧忍口不忍鱠  
修鱗失水玉參差  
晚日搖光金破碎  
咫尺波濤有生死  
安知平陸無灘瀨  
此身寧供刀几用  
著意更須風雨外  
是間相忘不為小  
濠上之意誰得會  
枯魚雖泣悔何及  
莫待西江與東海

赤手取魚如拾塊布網鳴絃攻腹背豈知激濁與清流  
恐懼駢頭牽翠帶居士仁心到魚鳥會有微生化餘鱸  
寧容網目漏吞舟誰能烹鮮作苛碎我亦江湖釣竿手  
悞逐輕車從下瀨生當得意落鷗邊何用封侯隨鳶外  
不如此魚今得所置身暗與神明會徑須作記戒鯨鯢  
防有任公釣東海

舟中

野火燒原雉昏雝黃塵漲天牛亂鬪江間無日不風波

老去何時脫奔走詩書滿腹不及口遮日寧須釣竿手  
愧爾茅簷炙背人仰看青天搔白首

送鄜州關司法

早歲相知晚相識抵掌回頭已陳迹萬里從軍壯此行  
一箸鱸魚留不得夜靜關山秋月明莫聽嶺頭秋水聲  
平世功名須少壯看君一箭下遼城

蠅虎

物微趣下世不數隨力捕生得稱虎匿形注目搖兩股

卒然一擊勢莫禦十中失一八九取吻間流血腹如鼓  
却行奮臂吾甚武明日淮南作端午

范祖禹

月夜船行入資川

憶昨卧碧山蒼蒼叢桂間白雲為屏石為枕綠蘿長挂  
明月間忽乘輕舟汎江水山月隨人還在此白鷺驚飛  
宿靄間青山倒卧蒼波底此時孤櫂發中流川后停波  
聽櫂謳不學子猷中夜返欲乘明月向資州

蘇頌

和胡俛學士紅絲桃

京都花品予嘗評夭桃僅有十數名含絲繁豔今始識  
鮮苞長蕊標紅纓春晴日暖助顏色灼灼一片朝霞輕  
鮫綃剪碎旋裝綴虬須摘盡將紉縈因知化工巧難狀  
偏於草木呈瑞精又疑華燈九光爛蜂蝶不敢來窺爭  
江南萱草易滋殖維揚芍藥初種成此花皆有紅絲號  
恨不同時相合并君家數枝發庭際愛翫常挂簾鉤瓊

有客風流欲寄目主人喜笑張筵迎飛觴灑翰偏得意  
都緣尤物牽風情我雖多病不能飲猶思強舉花前觥  
省中早出與同僚過譚文思西軒詠太湖石

洞庭山連震澤水怪石巉巖出波底誰言行遠莫致之  
好事經營俄至此愛君小軒才袤丈滿地新芳雜紅紫  
偶來凭闌見奇峰便有江湖秋思起

彭汝礪

答同舍遊凝祥池



仙宮神靈之所宅樓閣倚天一千尺先生好游猶挾冊  
藜覓不慙吾鼎食凝祥池頭三月春腰金騎犢多貴人  
天邊五岳煙霞閭海上三山雨露新蛺蝶能飛燕能舞  
鳳凰在雲鴻在渚仙人參鸞入雲霧寂寂不聞青鳥語  
洞天落日晚沉沉漁舟縹緲桃源深紅玉坐看花著子  
青雲行見葉成陰疾雷怒飛風雨急瘦馬不行歸旆濕  
投閒一日須一來歲時變化猶呼吸

昨日餞趙教授行會飲秀楚堂晚徙櫻桃花下

夜月上正夫設燭於花上光明焜耀昔所未見  
正夫因約賦詩

夜涼月色清如水天靜無風塵不起移酒近花坐明月  
畫燭橫斜插花裏月寒燭豔花淡薄意思相疑不相似  
一下一高總能見半白半紅渾可喜時有幽香闇著人  
更分疎影低臨水密成雲霧即成陰團作珠璣看結子  
異時尚擬與君醉景物更作今日比富貴功名是底物  
人生百年行樂耳

李昭玘

送徐舉人赴省試

淮夷之珠照夜月  
泗濱之石聲泠泠  
昔時大禹致方物  
神光玉色羅廣庭  
比年入獻多豪英  
褒雄妙思相憑陵  
飄飄束書去觀國  
瘦馬踏雪鬚垂冰  
長廊白晝天宇清  
落筆冉冉風雲生  
千官拱笏赭袍近  
碧溝新柳黃鸝鳴  
金撾虎士傳姓名  
魚龍卷尾隨雷聲  
州人洗眼望歸騎  
會約春風載酒迎

李之儀

晚過王晉卿第移坐池上松杪凌霄爛開

清風習習醒毛骨華屋高明占城北牙牀偶伴庾江州  
萬蓋搖香俯澄碧陰森老樹藤千尺刻桷雕楹初未識  
忽傳初晡半天來舉頭不是人間色方疑絢塔燈焰耀  
更覺麗天星的歷此時遙望若神仙結綺臨春猶可憶  
徘徊欲去輒不忍百種形容空歎息亂點金釭翠被張  
主人此况真難得

題王子重出李成所畫山水

主人邀我登閒軒軒前景物祇欠山坐來慘淡若不足  
引我忽到營丘間營丘山水天下知全齊十二雄一時  
舊遊歷歷如到眼吾宗筆力窮高低峰雲巖靄互隱現  
老木蒼藤紛綵絢瓏璵特幹勢將壓奇崛欲夸人未見  
石磴流泉似幽噎洞穴縱橫乍明滅舉頭樓觀俯懸崖  
定須六月臨飛雪行人初踏山前路款段衝寒怯回顧  
蹇驢亦自樂平地蹕耳徐行方得趣日西平遠連何處

極目蒼茫天欲暮行人端是我前身斗覺精神相會聚  
百年瞬息竟誰真此老應無一點塵主人等是風塵外

豈是閒軒久住人

子重家有閒軒

春日同梁十四醺李公昭朝霞閣侍兒舞梁州  
曲徹客有以潤羅為贈公昭命玉杯滿酌酬之  
又以金鍾邀兒相屬既醺出烏絲欄索詩

都城春風吹落花都城九陌無塵沙貂裘公子醺何處  
闌干百尺陵朝霞鳳箏新調玉指軟黃金捍撥當胸遮

紫檀屢碎翻成拍紅茸毯襯鴟頭襪回旋誰許綠雲輕  
欲斷還連猶未徹新鶯弄雛乳燕飛一曲涼州春日遲  
百足纏頭隨玉杯尹啞一闋爭扶持公子笑不已下客  
歡正濃更邀姪姁持金鍾一嚼直欲滄溟空從他海若  
在平地明珠隨淚愁蛟龍珊瑚突兀撐高峰便疑已姪  
御來風月漸滿銀河低歸路促街鼓稀何時再到紅茸  
地更倩游絲惹住衣

蘇庠

王文儒新築小圃賦贈

王郎臞菴摩詰詩煙花遶舍江遶籬石渠東觀了無夢  
筆牀茶竈行相期古人已往不可作甫里顧有今天隨  
灣頭蟹舍豈著我請具蓑笠懸牛衣

謝逸

送董元達

讀書不作儒生酸躍馬西入金城關塞垣苦寒風氣惡  
歸來面皺鬚眉斑先皇召見延和殿議論慷慨天開顏



謗書盈篋不復辨脫身來看江南山長江滾滾蛟龍怒  
扁舟此去何當還大梁城裏定相見玉川破屋應數間

豫章別李元中宣德

舊聞諸李隱龍眠伯時已老元中少一行作吏各天涯  
故人落落疎星曉西山影裏識君面碧照章江眸子瞭  
向來問道渺多歧只今領略歸玄妙老鳳垂頭噤不語  
古來查牙噪春鳥身在幕府心江湖左胥右律但坐嘯  
第愁一葉釣魚舟不容七尺堂堂表我今歸臥靈谷雲

君應紫禁鶯花繞相思有夢到茅齋  
細雨青燈坐林杪  
謝邁

雙蓮閣

水芝凝露披芳塘淺妝濃畫爭煌煌  
其間豔異不世出  
連芳並蒂知何祥有如一座兩殊色  
盈盈植立漢昭陽  
九回沉水不須沐風梳露洗皆生香  
公如瑤林映紅粉  
粲然一笑傾澄觴故開華閣挂銀榜  
大篇金薤垂琳琅  
吾聞草木正瑞世簾蒲扇暑芝生房  
須煩丹青顧陸手

貌取絕豔歸明光

碧筩

君不見韓潮州銀作飲醖誇工倭鑄花鏤葉太瑣碎何  
言豪士亦爾為又不見六一翁嘗吟鸚鵡紅螺詩華堂  
一醕豈不樂清歌勸酒須蛾眉吾儕山人寧有此競折  
圓荷為飲器細傾初作露珠圓滿引忽驚雲液碎鼻中  
寂寂聞妙香舌本徐徐識真味採蓮當散花當妓豈有  
登臨百金費安得城西十頃塘水光容裔暑風涼時引

碧筩如象鼻仍看翠蓋立霓裳

秋日登鳴玉亭

山路秋陽何赫赫山亭淒冷多秋色豈惟醒耳玉淙琤  
照眼光寒如練白舊聞瀑布垂雲間恍疑銀河墮天關  
西望香爐不得往箇中原有小廬山

李彭

夢訪友生

少年結客長安城妄喜縱酒同章程支離老去一茅屋

枕書卧聞長短更友生相望止百里寒夜寥閒無微聲  
夢中乘興輒見戴剡溪聊爾扁舟行覺來遽遽一榻上  
不用僮僕爭驩迎吹燈弄筆欲書寄窗前白月方亭亭  
阻風雨封家市

往時李成寫驟雨萬里古意毫端聚行人深藏鳥不度  
便覺非復鷺溪素龍眠老阮作陽關北風低草雲埋山  
行人客子兩愁絕未信蒲萄能解顏兩郎了解人意  
似是畫我封家市戲作新詩排晝睡忽有野雁鳴煙際

洪朋

寫韻亭

紫極宮下春江橫紫極宮中百尺亭水入方州界玉局  
雲映連水羅翠屏小楷四聲餘翰墨主人一粒盡仙靈  
文簫采鸞不復返至今神界花冥冥

洪炎

南城鄧氏亭

小麥青青山一曲江南千里傷春目盱母江頭喚渡人

遙指麻源第三谷，裹鹽包飯各怱怱。  
回首煙霞樓觀中，詩成更覓羊何和猶是前身內史公。

劉弇

秋日儀真即事

秋風來從越天末，痛洗玻璃出明月。  
雲陂隱起玉龍眠，下有春容萬濤雪。  
獨繭之綸敲一葉，半酣老漁棹歌發。  
客心寸許了無多，底事臨風吹欲折。

丁字河頭紋錦翼，似是東園故鷓鴣。  
天風蕭蕭吹汝急。

遣汝周章無好色江籬幕歷過行人一顧為之三歎息  
我願舴艋從溪翁雙舂鋤邊作幽客

鄒浩

謝衡州花光寺仲仁長老寄作鏡湖曹娥墨景

枕屏

道人秀骨生何許若耶溪邊清氣聚不從章甫事功名  
遊歷諸方參佛祖祝融峰下忽擡頭覷破虛空笑而舞  
折脚木牀二十年門外草深無寸土偶然消息落人間



挽出花光照今古我舟邂逅泊山前霧卷雲開見睂宇  
更知我自浙東來曾擁旌旗塵督府千巖萬壑繞罇罍  
夢斷卧龍誰是主為將池墨灑蛟綃故國封疆歸擇取  
曹娥江接賀家湖環以峰巒暝煙雨森森喬木動樵風  
廟貌崢嶸悶神禹碑留遺刻蔡邕題注目端為楊主簿  
子猷興盡季真亡髣髴棹聲迴遠浦乾端坤倪渺莫窮  
咫尺并包入庭戶坐令鄉思滿瀟湘恨不歸飛插雙羽  
蒼梧洞庭南北中氣象縱橫隨步武祗緣流放阻君親

入眼雖奇若無覩道人方便巧施為乃以家山慰心腑  
舊愆猶冀獲消除恩錫餘年返農圃青鞋布襪謝塵埃  
肯使高蹤慙杜甫

有感

雲回雨歇天欲晴鵲鳩喚婦皆和聲山南山北樹陰裏  
歡然相趣爭飛鳴伊予流竄止平樂妻孥尚寄瀟湘城  
五嶺橫空喚不聞不如鵲鳩猶有情

唐庚

戊子大水二首

錄一首

踏歌喧喧雜饒鼓潭邊呼龍令作雨龍噴揮水十丈餘  
千邨萬落幾為魚寄謝龍神且安處熟睡深潭不驚汝  
劍州道中見桃李盛開而梅花猶有存者

桃花能紅李能白春深何處無顏色不應尚有數枝梅  
可是東君苦留客向來開處當嚴冬桃李未在交遊中  
郎今已是丈人行肯與年少爭春風

贈譚微之

去年絃歌程水濱  
甌中生塵范史雲  
今年講學鷺城裏  
關西孔子楊伯起  
昔人論士觀心期  
時人論士看肉皮  
只知黃鵠矜觜爪  
不識騶虞避生草

別勾永叔

巴江濫濫巴山空  
十里五里蕉花紅  
少年銳意立功業  
破煙一棹輕如風  
却思三歲相歡聚  
說劍論詩輕李杜  
平生不作女兒悲  
今日為君重回顧

黃裳

惇禮兵部久不作詩偶成數韻奉戲

南宮先生好談古齒牙所挂多老杜  
劍氣中盤幾時吐  
欲看光芒出庭戶平生氣直易言語  
不解聾牙斲詩句  
先生莫學東野苦我願為雲相逐去

簡元興祠部

百花巖上仙人住巖下為州山水聚  
白頭青塚南北人  
倒影沉沉獨懷古倚欄把酒與誰同  
况是使君為獻主  
應喚漁舟疎葦中旋膾游鱗落紅縷  
祕書座中最軒昂

能共春雲爭態度紅衣帶月今何處幾轉春殘掩朱戶  
飛船送客空斷腸梁塵謾落聲中句虛白亭前湖水閒  
忽為霓裳起思慕出門沙土亂如雨薰風吹夢天南去

邀月亭

迎暉不覺一日盡邀月又會三人間未言期約綠巖畔  
且共歌舞清樽間霜輪皎皎無今古世途擾擾多新故  
今月曾經照古人古人問月今何處百年光景行復催  
有月可邀能幾回雙巖達士不須說始見迎暉復邀月

矮松

枝幹偃蹇奇可誇  
本根融結杳難測  
龍蛇已報千歲靈  
梁棟何煩萬牛力  
雖減半天風雨聲  
却得三冬雪霜色  
衛生已免斧斤入  
妝景何辭吟醉客

送陳知縣

握手州東花闌時  
瀉酒胸中如漏卮  
各無官守竟信意  
坐間只有春相隨  
十年睽遠何所得  
但悟世情能守一  
昨日小軒君不遊  
荷葉雨聲池上秋  
明珠得喪百萬斛

何慮炎蒸金欲流一樽獨對清都夢可憐幽思無人共  
今日聞君馬已西不覺毫端得詩諷汝陽縣長多清風  
壺中有客當相送

費長房挂壺  
木今在汝州

題水雲邨

水雲深處尋幽客競把銀瓶飛琥珀坐間玉篆流杯來  
時伴桃花獻春色塵勞不到清樽前何幸山翁設歌席  
人在夕陽方醉時回首雲迷武陵宅

崔鷄



早春偶題

寒風浙瀝鳴枯葦小鴨睡殘猶未起更教細雨結輕寒  
坐聽蕭蕭打窗紙石盆養蒲已抽翠雕斛栽花先弄紫  
擁爐閉閣賦幽香未怕春冰生硯水

楊時

南康值雨

廬山卧龍菴有劉道人自云百餘歲碧眼不粒食  
惟食栢飲水每客至必先知之欲往見之不果故

并記之

平沙漲雪清江瀆水花照日紅生鱗軒然五老出城表  
雕玉萬仞窺長身雲巾星弁覆華頂飛泉漱瀑垂天紳  
平生未識廬山面碧巘橫雲望中見江頭一夜雨銜天  
奔浪號風作悲健朝來淤泥沒牛馬咫尺坐論千里遠  
芒鞋拄杖挂塵屋神馬尻輪歛飛轉卧龍菴前碧眼翁  
日飲山淥餐溪松神融氣合八荒外此心炯炯宜先通  
未須勒移却俗駕會應一洗塵寰空寄言歸侍壺丘子

他日來遊當御風

遊武夷

是日泛小舟至雞窠巖還遊沖佑觀

函關崎嶇走秦鹿天下並逐爭羣雄  
抉雲翻空鰲足折黔黎竄伏如寒蛩  
武夷山深水清泚避世猶有高人蹤  
龍泓東注海波涌

嶺有投龍池世傳與海通

玉女翠擁秋雲鬆赤霄

真骨寫虛壁通泉凡筆輒非工

魏王峯前有畫閣

藏舟浮梁跨

絕壑

山間有小橋橋西有一小舟皆人跡不可到

隱見似與天潢通當時雞

犬不復見窠巖依舊煙霞籠  
我來秋杪月旣望尚有幽

菊埋榛叢天容洗淨雨新霽雲幕四卷清無風掀蓬進  
棹窮異境注目想見流殘紅回船杖屨躡幽徑松竹窈  
窕環琳宮翠琬溫辭耀華袞

褒詔有  
石刻

金榜大字纏交龍

自憐病骨挂塵網幔亭高會何由逢解衣歸卧玉瑣碎  
仰看明月穿疎篷

吳子正招飲時權酒局不赴作詩戲之

寒爐火冷浮青煙勁風刮面如戈鋌凝陰不動天欲雪  
竟日兀兀成拘攣廣文才名四十年天寒坐客猶無羶

參軍官小技能薄寂寞冷坐誠宜然忘形杜老偶相覓  
傳呼歌舞開華筵嗟予簡書固可畏不得對飲簷花前  
漫有糟漿送人鼻汝陽口角空流涎可能更似蘇司業  
只與時時送酒錢

晚雨

斷霞明滅天日黥雨意晴暉爭好醜浮雲冉冉無定姿  
白衣忽變如蒼狗悲風激烈河漢翻雨脚如麻飛霰寒  
山深氣腥豺虎亂乾坤四合誰云寬將溪野客懶成癖

怯寒手攣面如墨把杯強吞僵立歌閉門獨愁天已黑

霍洞

宿田舍

北風吹晴屋滿霜翁兒赤體悲無裳閨中幼婦飢欲泣  
忍飢取麻燈下績一身豈暇私自憐鳴機軋軋明窗前  
織成五丈布翁作襴裙兒作袴明朝官中催租急依然  
赤體當風立

韓駒

送葛亞卿

吾廬偏仄門三尺慚媿春風巧相覓叩關惟許葛王孫  
有時藉草傾餘瀝汝不如南池主人車載客紅旗皂蓋  
行遠陌又不如東郭公子柳藏門青娥綠髮坐開樽是  
身牢落終何為人不汝嫌汝自嗤伸眉一笑能幾時忽  
聞春盡王孫歸春風欲盡猶有情飄英隴絮俱傷神王  
孫未歸迹已埽秣馬膏車何太早明日一杯愁送春後  
日一杯愁送君君應萬里隨春去若到桃源記歸路

至國門聞蘇文饒將出都戲贈長句兼簡其兄  
世美

去年夷門十月雪九衢日是行人絕騎驢兀兀無所之  
破袖迎風手龜裂渡橋並慙得君家入門脫帽猶凜冽  
急然濕束暖我寒徐出清醑寧我渴君家自無擔石儲  
蟹黃熊白能俱設平生見酒唇不濡是夕連觥耳方熱  
羣奴夜僵喚不聞我亦鼾鼻眠東閣明朝起過城南翁  
尚記新聲一笑發東歸每歎懷抱真西來又喜顏色接



方將慷慨豁心胸未用崢嶸驚歲月城南詩翁況遠來  
門前雪泥又活活豈知萬事不可期却樹吳檣背城闕  
人生動若參與商咫尺無論限秦粵君聞吾語雖少留  
但恐一歡成電掣念昔相見無他娛誦詩徵事相誇捷  
氣凌俗子旁若無隅坐時聞竊嚅囁於今落落誰汝憐  
老屋陳編自怡悅寄言詩翁儻留滯歲晚動迂故人轍

題王內翰家李伯時畫太乙姑射圖二首

錄一首

太乙真人蓮葉舟脫巾露髮寒飈颺輕風為帆浪為檝

卧看玉宇浮中流中流蕩漾翠綃舞穩如龍驤萬斛舉  
不是峰頭十丈花世間那得蓮如許龍眠畫手老入神  
尺素幻出真天人恍然坐我水仙府蒼煙萬頃波粼粼  
玉堂學士今劉向禁直岩堯九天上不須對此融心神  
會植青藜夜相訪

題湖南清絕圖

故人來從天柱峰手提石廩與祝融兩山坡陀幾百里  
安得置之行李中下有瀟湘水清瀉平沙側岸搖丹楓

漁舟已入浦，漱宿客帆日暮。猶爭風，我方騎馬大梁下。  
怪此物象不與常時同，故人謂我乃絹素粉墨妙手煩。  
良工都將湖南萬古愁，與我頃刻開心胸。詩成畫往嘿，  
惆悵老眼復厭京塵紅。

送許卿出守邠州

長安北走彭原路，白葦黃茅列亭戍。山形漸險溪水渾，  
行人可肯回車去。豈知中有古邠州，十里沙平水漫流。  
雁飛蔽野葡萄曉，馬放連雲苜蓿秋。次卿卧聽朝雞久，

請試從來撥煩手未許相如喻蜀歸且看魏尚臨邊守  
雜花撩亂草鮮明二月春風卷旆旌燕寢凝香無一事  
樂哉飲酒莫論兵

陽羨葛亞卿為海陵尉作葺春軒余為賦之

昔聞先生隱吳儂當窗十里橫煙峰今見先生為楚吏  
繞牆四面縈煙水從來楚客帶吳風曲折徑路深房櫳  
舍前繫船柳十丈舍後參天竹萬叢千籤插架似蓬館  
白拂挂壁如僧宮埽地焚香欣客至羹魚飯稻愁樽空

不溷不清惟寂寞大笑先生致身錯青山猶作布衣心  
朱門却有田居樂筆回造化天工怒胸包今古時人愕  
甘窮自許元次山蹈海還尋魯仲連吾曹一歡豈易得  
世間百歲俱可憐何用北窗翻巧策且向東亭弄春色  
我當酌酒壽主人灘前飛下雙鷗鷺

順老寄菜花乾戲作長句

道人禪餘自鋤菜小摘黃花日中曬我嶠榘脯久不來  
麴糵薑絲典刑在封題寄我紙作囊中有巴蜀齋廚香

起炊曉甌八月白配此春盤一掬黃

梗軟木耳八月白稻名也

宗澤

題獨樂園

范公之樂後天下維師溫公乃獨樂二老致意出處間  
殊塗同歸兩不惡鄙夫杖藜訪公隱步無石砌登無閣  
堂卑不受有美專地僻寧遭景華拓始知前輩稽古力  
晏子蕭何非妄作細讀隸碑增慷慨端正似之甘再拜  
種藥作畦醫國手澆花成林膏澤大見山臺上飛嵩高

高山仰止如公在

司馬朴

無餘居士齋壁有沈傳師游道山岳麓詩石刻  
穆仲等和之因亦次韻

湘西勝景豈易論羣山騰閬萬馬奔鶴泉一麓騫鵬噉  
松風十里藏祇園當時侍御偶題寫筆力孰敢爭雄尊  
東京少年妙詞藻南陽舊族齊陰樊天心月脇出奇語  
使我展讀忘朝昏差差戈劒隱一敵落落旗鼓嚴千屯

無餘居士厲幽志細研六藝方專門凍飫嬌兒慣腸覓  
啼飢瘦婦餘淚痕惟君德義允相愜每窮道妙角與根  
他人勸酒驚逐魂二子頻酌勤空樽醉中詩成渺江海  
風外幡影徒飛翻卷藏篋笥已戢戢風生襟袖何軒軒  
嗟乎我亦有餘腐陋哉羊政囚華元

御選宋詩卷三十



欽定四庫全書薈要卷一萬八千三百三十八

集部

御選宋詩卷三十一

七言古詩七

李綱

奉酬陳之元教授見贈次韻

謫官因得窮林泉  
陶寫聊復資詩篇  
青岑疊疊山滿眼  
碧波湛湛溪涵天  
南連海嶠饒霧雨  
北望吳越淒風煙  
感懷觸目還得句  
但可娛戲那可傳  
譬如候蟲與時鳥

自鳴自己真偶然豈知飄落廣文耳飾以妙語煩雕鐫  
與公平生未相識一見傾心誰與易沙陽百里阻遊從  
注目寒空暮雲碧竭來邂逅慰所思況得新詩飛霹靂  
我今歸去隱梁谿遠跡江湖養愚直看公白日上清霄  
九萬扶搖不勞力

九月五日對菊小飲簡申伯叔易

淵明愛此九日名對菊無錢可留客杜陵爛醉作生涯  
青蕊空嗟未堪摘我今鼓柁適長淮坐見幽叢爛漫開

自從多病久不飲又爾一洗黃金壘東南節物誠已早  
翠葉金花為誰好三徑荒蕪爾尚存未覺出山同小草  
世間萬事皆可忘且須泛此酬秋光平生最愛老坡語  
菊花開日即重陽

趙鼎

紫霄圃

羣仙邀我遊蓬島白鶴隨人拾瑤草英靈指點洞門開  
前行後擁商山皓崎嶇石路燕尾分露濕蟠桃壓竹倒

一山萬山雲氣深琅玕珠樹霜風老王喬縹緲自天下  
世許高情兩相好中有一人字安期笑捧金盆具瓜棗  
食之令人可長生遨遊八極登天行有時一日三萬里  
西風鶴背霞衣輕有時亦復一暫息長歌一曲煙雲凝  
高垂鐵鎖蒼苔古云是神仙紫霄圃芒鞋竹杖躡步間  
丹鳳飛來向人舞雲中雞犬異人世藥鼎丹爐用心苦  
開軒一飲三百杯簷花亂落天飛雨青紅黑綠亂眼前  
萬草千花莫能數茫然拂袖下山來白髮婆娑鏡中覩

歐陽澈

七夕後一日寄陳巨濟

高樓昨夜西風轉耿耿銀河雲葉卷擎空皎月弄嬋娟  
領略溪山堪指點秋光次第磨青銅一味清涼龍庭院  
遙知天外鵲橋成牛渚黃姑會佳燕凭高翻憶鳳樓人  
慙慙乞巧陳芳莫可堪目斷心旌搖砌成幽恨無人展  
促樽欣得莫逆交脈脈間愁憑理遣清狂舉白話平生  
午夜香然殘寶篆淒涼此際憶年時爛漫瓊樓興不淺

重遊寥陽洞有感

尋真曾到寥陽殿小立廊腰花影轉飛瓊仙子下瑤臺  
綽約雲鬟眼波剪水沉煙斷一簾秋醉睡海棠紅玉軟  
武陵歸去探年華揚州夢覺江波遠重來風物恰依然  
愛日融融素煙卷洞門寂歷鎖長春異木槎枒插天半  
霞衣冉冉媚東風錄錄窗前重識面酒酣春笋理琵琶  
曲終依約含幽怨人間名利幾時休馬蹄不駐空留戀  
桃花流水古猶今回首碧雲人不見

輕風破暖

單衣初試輕寒退  
嫋嫋軟風經袖袂  
層樓高捲酒旗斜  
綺陌亂飛花錦碎  
多情故把惱人腸  
楊柳陰中弄暗香  
解貂不惜換美酒  
爛醉春光能幾場

鄧肅

大雨

夜夜陰雲如潑墨  
雨勢欲挽銀河竭  
春工十八落泥塗  
驟雨誰云不終日  
魏紫姚黃業已空  
嬉遊何足介心胸

只恐年年禾黍地浸淫盡入陽侯宮憑誰為我呼少女  
埽空陰翳開天宇光風霽月暖層霄坐令六合同歌舞  
寒梅上李舍人

窮山觸目紛茅葦此意昏昏誰可洗竹間忽破一枝梅  
對月嫣然耿寒水吟詩索酒滿高堂穿簾的皪射晶光  
世上羶葷來不到剪剪天風吹冷香人言百花睡未起  
獨冠羣芳差可喜那知和羹自有期未用爭雄壓桃李  
但憐雨雪正濛濛寒意未舒萬象窮故作選鋒驅殘臘



挽回天地變春風

電

黑雲壓山山欲頽  
阿香推車震不開  
廣寒宮中珠徑寸  
狂風傾下九天來  
高堂砰轟倒四壁  
萬瓦飛空如轉石  
燈火青熒不敢明  
世間誰有膽三尺  
年來蠢動敢爭豪  
鯢鱣起舞狐狸嘯  
一振天威百怪息  
夜半雲收北極高

題梅齋

江邊蘆葦風颼颼  
東君一點破寒愁  
窗間疎影橫春瘦

枕上吟香尋夢幽夜半竹折驚殘雪醉起捲簾千山月  
肺腑洗空龍麝腥落筆天香闔清絕

題吹衣亭

馬上衣衫浣塵土斂板權門腰偃僂冷風天上呼不來  
厚顏如甲汗如雨星郎高韻如雲煙天籟喚歸如流泉  
人間熱惱熏不到亭上鶴衣飄欲仙君方醉樂人愁絕  
何如御此登天闕叩天借我衣上風吹下九州作春色

汪藻

阻風雨辟邪渡寄王仲成

渡頭急雨鳴森木木杪顛風飛大屋沒腰寒水稻生芽  
滿眼青泥車折軸山行值雨舟值風窮愁日日煩天公  
不如歸卧澗壑底世事不埽春煙空別君兩年重此別  
喜君胸次渾冰雪擬將身作賈胡留無奈事如空鳥滅  
挽我不回君怒嗔交情把玩轉清新相隨百里還相見  
只有西山似故人

李彌遜

陪館中同舍遊方池分韻得香字

紅蕖碧水如曲江醉惱諸人欲斷腸  
波光花氣來無方人面生春酒面涼  
男兒莫遣兩鬢霜何妨騎馬似知章  
銀鈎未落片雲黑定有六丁呼阿香

獨宿昭亭山寺

山寒六月飛霜雪樓殿夜深鐘鼓歇  
琅玕無風萬戟閒屋角明河挂天闕  
龍牙七尺玉壺冰炯炯神清夢不成  
可憐幽絕無人共用看雲頭壁月生

承廳後圃雙梅一枝發和似表弟韻

漫遊蹤跡成浮家一身四海驚年華不禁草木競時節  
忽見霜榦排新花曉雲生寒日未透南枝半肥北枝瘦  
就中一枝最先發浪蕊浮花敢居右山翁涉世與狼如  
功名日遠霜凌鬚與花同是江南客一笑為解東陽臞  
吟哦繞樹正百匝未放零落空殘株春風雜花儘明媚  
此君風味懸知無雨中著子尚不惡可堪老葉繙蟲書  
歲後三日與羅叔共二邵似表弟席上分賦梅

花得多字刻燭成

春風一夜如鳴鼉殘香暗粉驚辭柯新春三日駒隙過  
花前百罰寧辭多男兒莫遣兩髯皤舉觴不飲理則那  
酒酣不用吳姬歌短鬚尚足供吟哦坐中鮑謝偕陰何  
語如韶濩參鳴珂鏗鏘入耳痊沉疴豈獨使我衰顏酡  
我今官閒得婆娑遲明更上梅花坡

過魯公觀牡丹戲成小詩呈席上諸公

昨日花間風送雨淚臉凝愁暗無語今日花開天色明

向人豔冶百媚生雨中多思晴亦好日日看花被花惱  
人間絕色比者誰漢宮飛燕開元妃輕嬾淺笑各有態  
淡妝濃抹俱相宜傳聞姚魏多黃紫醉紅不似當年枝  
移樽洗醖苦不早明日春光暗中老西齋居士心已灰  
也向花前狂欲倒

秋夜枕上偶成

七月西風捲殘暑砌外蕉梢響寒雨青蠅斂翼蛭收聲  
樓上逢逢夜將午徽絃信手酒自傾一杯一杯宮羽成

醉頭著枕百事置夢殘睡足天未明

將至徽州道中作

平生愛山老山間行山怕盡去復還茲遊深入衆山囿  
一日看盡平生山頗聞黃山最奇秀紫翠六六堆孱顏  
端如啖蔗及佳境快意不復同塵寰我生目力固有限  
應接不暇愁躋攀要令胸次洞表裏埽盡礪塊羅煙鬟  
會飲得助亭分韻得千字

長松下蔭八尺椽四壁不礙萬里天水邊笙簧成兩部



月裏山河收大千山中宰相塵中仙  
杯如流星酒如泉  
飢蟬鳴鳥莫浪語  
淨埽綠苔共醉眠

案上梅

天寧禪  
房作

橫枝當案雪未融  
夜窗印月影若空  
人憐太瘦不耐冷  
自抱幽獨無愁容  
春風雜花豈不好  
一笑難與孤芳同  
寧來作伴管城子  
靜炷沉水聽號松

孫覲

崇仁縣

萬山攢擁天一笠北風吹雨兩鬢濕  
飢鳥絕叫護巢飛  
老蛟怒起拏雲立孤城短日砧杵急  
騎驢渺渺衝泥入  
桑枝倒折機杼空道傍廢井無人汲  
遺民到今傳舊邑  
擊水華鯨浪三級故物漂流百戰餘  
客子起坐萬感集  
小驛香醪如雪汁一杯快作長虹吸  
酒醒寂歷照短檠  
幽咽數聲鄰婦泣

周紫芝

和趙鵬翔贈李生

人間作畫如作詩妙由心得非人為五日一石十日水  
此事無乃亦可期向來郭恕先妙手真復竒經年不肯  
下一筆胸中丘壑誰當知忽然有興不可遏寫作槎牙  
風雨枝回頭却笑閭立本緩急與人為畫師李生聞是  
成遠後一生落魄唯飲酒貴人金多不可撓閒日為多  
畫日少心知公子非俗人平生筆底波瀾翻故作滄江  
與巨石要看萬里風濤相吐吞誰知此老不足數自笑  
一生常苦辛桃花水暖小艇窄十年辜負江邊春時危

力小去未得畫圖入眼空傷神

李使君示開化諸詩

使君一出承明廬當年兩佩龜峰魚龜峰小兒騎竹馬  
笑挽朱轡歸故閭門外春風吹畫戟小閣香濃綺疏碧  
蘇州五字老更奇東陽八詠人誰敵山堂聞說公自開  
煙雨遙供翠鬟色更向招提山窟中竹杖穿雲飽經歷  
夜上孤峰看月明曉趁鐘魚著僧屐詩成知復幾牛腰  
倒廩傾囷公不惜他年舉似與何人知我耽詩老成癖

平日探囊止一錢驚見縱橫著圭璧當遣兒童勿浪傳  
按劒從來少人識

道卿論吳中夏果詞頗夸且借蘇內相春菜詩  
韻作詩僕亦同賦聊為江南解嘲

江南五月菱垂葉葉底紫菱如紫蕨梨香濺齒蔗漿寒  
瓜熟堆盤水晶滑紅薑抹縷雜吳鹽纖手淹梅帶微辣  
芳林露下摘金桃入眼燕脂紅臉抹木瓜甘酸天下無  
百果論功誰可甲朱櫻萬顆滴階紅滿架葡萄更肥茁

橙香栗子芋如鵠此品秋來不勝說老翁空作解嘲詩  
恐是年衰左車脫

駝山秋晚

溪邊茅屋知誰家門前水落溪露沙枯藤遶屋挂秋實  
黑如點漆紅丹砂蜀葵花空已收子雞冠樹高猶有花  
客來倚杖主人出屋頭日暖聽蜂衙

三月五日晚霽大風

雨後風扉擁青嶂家在斜陽晚潮上沙頭飛盡雪色鷗

柳下初橫短篷舫皇天烏料風忽顛賈客倉皇回五兩  
老人倚杖不肯歸看打南湖白頭浪

觀潮示元龍

越山莽蒼吳山高海門屹立通江濤江濤久客歸未得  
來趁吳兒看晚潮潮頭初來一綫白雪浪翻空忽千尺  
地中鳴角何處來水上六花人不識驚濤倒射須臾空  
千艘已落空濛中錦帆半劈浪花裏越商已賈爭長雄  
江湖險絕常如此風靜潮平亦何事人間萬物有乘除

却遣風波在平地

和張元明食生荔支

五月麥秋閩嶺寒嶺頭風雨荔支丹  
舊從圖畫見睂目何曾生食知甘酸  
天生尤物亦甚慳路遠致之良復難  
宮中妃子一破顏猶須驛騎來長安  
絳紗囊小欣乍識晚上蘇臺醉瑤席  
人如玉筍擘輕紅詩似春雲驚坐客  
書生饒相絕可憐誦詩口角空流涎  
何時遂作七閩客日啖玉肌三百丸  
獨勝窮愁杜陵老暮年奔走巴山道



萬里瀘戎摘荔支一年辛苦無人知

睡餘飛絮滿庭有感而作是詩

春水綠波南浦路兩岸誰栽楊柳樹含桃熟盡未聞鶯  
荷葉生時已飛絮絮絮將春去不可回人伴閒雲更須住  
我亦隨君似落花欲趁東風到何處

題東林香山像

大唐受歷三百年文士輩出俱可傳情雖嫵媚中骨鯁  
當時只有香山賢香山年少謫湓浦卧聽琵琶心獨苦

想得回舟夜半時半濕青衫淚如雨別來江月幾番圓  
黃蘆苦竹空淒然風流埽地那復有但見東風吹白鬚  
可憐畫手無前輩欲倩虎頭呼不起瓊枝玉樹了無蹤  
鐵撥鶻絃何用爾明朝一舸下潯陽月明依舊空江水  
五月二十四日晚雨忽晴浴罷獨卧池亭雲峰  
奇峭出天東南旣久方散

長虹截天雨初斷孤月翻光上銀漢忽從海底出三山  
就中蓬萊最奇觀黃金塗闕射日光白玉飛欄入天半

青童舞女各嬾手執雲幢影凌亂想得神清洞府君  
應傍春皇侍香案羣飛白鶴徒爾為化作蒼狗何勞看  
神仙出沒不久長碧落天宮豈容翫荆王曉夢只須臾  
神女乘鸞逐雲散人間幻化無不爾空復欹歔一長歎  
老人假寐忽舉頭但見明星光有爛

晚思

灘沙露尾江水乾江洪東峽江流湍千山落木風轉急  
萬里飛鴻天更寒暮雲政擁蒼玉玦落日忽下丹砂盤

他鄉久客去未得悠然東望心悲酸

王庭珪

和劉美中尚書聽寶月彈桃源春曉

何年鑿源開混茫桃花兩岸吹紅香  
煙消遠浦生微陽  
漁舟誤行溪水長  
溪回岸轉山隙光  
疑有絳闕仙人房  
居民爭出羅酒漿  
花間笑語音琅琅  
抱琴釋子眉髮蒼  
響泉韻磬鳴長廊  
能談往事悲孟嘗  
昔時臺沼今耕桑  
又如勇士赴敵場  
坐令遊子思故鄉  
清猿抱木號鴻荒

孤吟劃見丹鳳翔曲終待月西南廂重調十指初不忙  
如見古畫秦衣裳春天百鳥爭頡頏桃源歸來今已忘  
彈到落花空斷腸

早行

羣雞鼓翼天欲光井上梧桐生微涼殘星爛爛或出沒  
初日淡淡開青蒼楚妃臺邊曉雲碧伏波廟前秋草黃  
騷人辛苦拾何物沅有芷兮今已香

送向豐之

君家梁苑妙人物羯末封胡咸勃率子今二十能綴文  
詩如陣馬敢馳突此去荆湖道路長要吟秋水動三湘  
歸時蕉葉應黃落賸拾騷人春草香

次韻周公予趙逢源過瑤林洞中探酴醾

桃花落盡春風顛兩翁並轡來翩然入門下馬看花發  
仰攀綠葉窺青天倚檻謳吟發清唱終夕擁鼻鳴寒蟬  
唐昌仙人識玉蕊借月下看乘飛煙明朝池上拾落粉  
草間點綴如連錢狂思玉爪搔背癢不可安得麻姑鞭

歸來兒童應拍手笑君騎馬似乘船醉後猶能作長句  
半夜打門驚我眠

次韻酬劉太虛惠端硯

端溪之水深莫測千夫挽綆下取石溪翁採得歸不眠  
夜劖鵲卵出蒼壁君從何處得此寶贈我慙非玉堂客  
况無健筆寫銀鈎墨汁徒翻老鴉黑

次羅伯固聽琴韻

焦桐初不受文理絃以朱絲竒乃爾坐中忽聞太古音

寵辱頓忘那有恥官廳曾有一日閒奏刀未覺肯綮難  
抱犢兩衙鳬雁退目送飛鴻聊一彈爽氣朝來如有約  
幽林鳥語山間樂琴罷揮毫各賦詩滿袖珠璣何璀璨  
晚風歸袂失炎蒸却憶冰壺此段清酒醒月白重開匣  
更作松風夜雨聲

沈晦

獨山

山頭白雲如擘絮竹雞無聲鳩喚婦團團朝日上林梢



寒食梨花溪口路一峰獨秀橫溪陰青林倒影千丈深  
上有白龍蟄幽洞歲旱往往能為霖如今寂寞空山裏  
古屋荒壇雜蛇虺會看六月旱生煙坎坎伐鼓相料理

呂本中

濟陰寄故人

柳絮飛時與君別南樓把酒看新月月似當年離別時  
柳絮隨君何處飛千書百書要相就思君不見令人瘦  
念君情意只如新顧我形骸已非舊朝來有信渡黃河

雁足繫書多網羅城南城北芳草多明月如此奈愁何  
久雨路絕賓客稀少聞后土祠瓊花盛開亦未  
果一往也

卧聞更鼓濕不鳴曉窗但有推簷聲雲橫不放山入座  
風怒欲倒江衝城東家酒熟花爛漫折簡喚客留娉婷  
街頭泥潦一尺許意雖欲往無由行儒生活計亦不惡  
蒲團堅坐到日落映窗香穗觸凝塵過眼文書開病膜  
明朝新晴有佳處穩看小檻翻紅藥無雙亭下一枝春

玉潔霜清未寥廓  
閉門嬾出君莫笑  
看汝多愁吾獨樂  
故人無事倘能來  
為君試舉舒州杓

黃池西阻風

烏雲銜日日不出驟雨飄  
風吼三日扁舟寸步不得行  
坐歎輕鷗如箭疾我行去家  
秋復冬故園回思春夢中  
客愁茫茫若江水生計渺渺  
隨征鴻三年京塵共憔悴  
一杯此地難從容長溪卷浪  
雪花碎遠山橫空眉黛濃  
故人別我上江去亦有書來  
喚同住破屋數間君有餘

太倉五升吾已具嚴霜未放鷹隼擊盤渦恐致蛟龍怒  
片帆欲挂任篙師君但徐行莫深懼

夜坐有感

五更月落雞未鳴小爐殘火猶晶熒道人強起理衰疾  
不聞松聲聞雨聲跣趺坐穩百念去豈有宿夢令神驚  
平生於世萬事嬾况復今茲飽憂患中原北望四千里  
三年不見南飛雁著身天涯未為遠所至風沙莫深歎  
時寒但赴僧房火日暖可赴鄰家飯嶺南無瘴便可老

江頭有酒猶堪喚嗟哉甯子不自休辛苦飯牛過夜半

陳與義

來禽花

來禽花高不受折滿意清明好時節人間風日不貸春  
昨夜燕脂今日雪舍東蕪菁滿眼黃蝴蝶飛去颭斜陽  
妍媸都無十日事付與梧桐一夏涼

鄧州城樓

鄧州城樓高百尺楚岫秦雲不相隔傍城積水晚更明

照見綸巾倚樓客李白上天不可呼陰晴變化還須臾  
獨撫危欄詠奇句滿樓風月不枝梧

欲離均陽而雨不止書八句寄何子應

江城八月楓葉彫城頭哦詩江動搖秋雨留人意戀戀  
水光泛樹風蕭蕭綸巾老子無遠策長作東西南北客  
不如何遜在揚州坐待梅花映妝額

謝主人

春禽勸我歸主人留我住一笑謝主人我自無歸處擬

借溪邊三畝春結茅依樹不依鄰伐薪正可煩名士分  
米何須待故人

已酉中秋之夕與任才仲醉於岳陽樓上明年  
十一月二十日南遊道過謁姜光彥出才仲畫  
軸則寫是夕事也剪燭觀之恍然一笑書八句  
以當畫記

去年中秋洞庭野寒瑤萬頃兼天瀉岳陽樓上兩幅巾  
月入欄杆影瀟灑世間此影誰能孤狂如我友人所無

一夢經年無續處道州還見倚樓圖

蠟梅

智瓊額黃且勿誇回眼視此風前葩  
家家融蠟作杏帶  
歲歲逢梅是蠟花  
世間真偽非兩法  
映日細看真是蠟  
我今嚼蠟已甘腴  
況此有韻蠟不如只愁繁香欺定力  
薰我欲醉須人扶  
不辭花前醉倒卧  
經月是酒是香君  
試別

沈與求



次韻何子楚食櫻桃

輕衫駿馬飛彈丸上林花開紛繡團御廚賜筍未解籜  
山櫻亦復登金盤宗廟薦新勤玉輅凡果紛紛不論數  
風清日美雨絲收朱實烘春然綠樹筠籠採擷價萬錢  
北人羊酪雅所便自從燕罷曲江曲五湖十載身回旋  
已作孤蓬任流轉萬顆徒勞野人獻故無清夢大明宮  
醉倚酡顏浮玉碗

鄭維心約趙安道中大家兄次律學士及僕探

梅城山乘月汎舟而歸

窮居不厭車馬絕委巷衡門常晝閉朝來剝啄誰過予  
倒屣逢迎走驚蹶里中勝士真可人為憶寒梅耿殘雪  
招呼聞早探幽芳平溪徑遣扁舟截西山佳處雲塢深  
松竹蕭森迷洞穴上方小閣鎖空明開窗下見千山列  
畫手無人貌平遠野闊天多供一瞥冰花只作小寒枝  
拄杖不辭穿薺薛野僧省事畏客狂攀援自向南枝折  
疎香低入坐中來骨冷肌清伴高潔襟期況有公子賢

伯也雄豪負奇節手拈凍蕊薦深杯妙語琅琅契禪悅  
人間此會不多有忍放杯空成小別歸來懷抱與誰論  
一棹翻然載明月

夾竹桃花

搖搖兒女花挺挺君子操一見適相逢綢繆結深好妾  
容似桃萼郎心如竹枝桃花有時謝竹枝無時衰春園  
灼灼自顏色願言歲晚長相隨

程俱

夜半聞橫管

秋風夜攪浮雲起幽夢歸來度寒水一聲橫玉靜穿雲  
響振疎林葉空委曲終時引斷腸聲中有千秋萬古情  
金谷草生無限思樓邊斜月為誰明

題海會寺

萬杉堆青沒山骨雲埋七峰時出沒飛泉拂石瀉哀湍  
下有萬古蛟龍窟藏頭睡熟呼不起地坼三年蝗蝻出  
千山脈理漬清甘一罇涓涓流石液同遊况與惠詢輩

納履振衣何勃窣大門當前新築道跨水曲欄敲突兀  
春鳴轆轤趁朝炊水圳懸流機械發撻節對此自三歎  
抱甕老人長搨搨却坐幽堂忽浩歌回首已失西山日  
到官兩旬四走山野作詩以自勞云

上山偃伸如望天下山偃仆如探泉胡為持此不貲寶  
來試萬丈懸崖巔前人見踵後見頂反足鳥道相攀牽  
欵然置我章貢上水激石罅奔雷填荒塍曲澗無遠近  
渺渺不見墟中煙土岡鑿路狹如隧蘚壁藤薜蛟蛇纏

寒風颼颼失白日上有萬木蒼陰懸航溪之深揭其淺  
碎石齧足聲號川茗山發我一長喟彼有吳市中仙  
飛瓊練玉存古處祇有井竈無霜鉛我今正坐五斗米  
悔不辟粒從期佺向來吳淞厭羈旅三歲半逐鷗夷船  
故教莞庫著疎嬾坐守兀兀聊窮年安知求逸得奔走  
豈異避挺蒙戈鋌咄嗟萬事無必計努力唯有歸園田

按圖經茗山有梅福鍊  
丹竈故有飛瓊之句

陳淵

蕭山覺苑寺雪後杜門

雪融簷溜如秋霖古寺掩關無足音詩書廢放道眼淨  
鐘鼓杳隔禪房深老僧勸坐媒以火茶鼎靜聽蒼蠅吟  
胸中激梗造澄澈一念不作千憂沉浮生半日未易得  
邂逅勝境聊安心明日孤帆落何許歲晚濁醪誰共斟  
鄧志宏送張思道遊福唐次韻

紛紛浣耳俱宜洗坐遣高人厭丘里迅流早自促行舟  
更有西風滿江葦當年筆陣埽千人今日流輩推能文

英辭雄辯灑醉墨倏忽百變春空雲人間萬事秋毫細  
軒冕儻來誰著意身隨去櫂落波間興逐冥鴻渺天際

朱弁

蘇子翼送黃精酒

仙經何物堪却老較功無如太陽草龍銜雞銜名雖異  
菟公羊公事可考蘇君真是神仙裔橘井陰功貫穹昊  
雲笈書成數萬言銀闕珠宮用心早獨知此物有奇効  
福地名山為儲寶不憚林泉新斲掘斥去杵臼謝篩擣



況從高士論麴蘖更課公田收秣稻一朝靈液浮瓮盎  
三冬浩氣生襟抱且欣軟飽得澆腸漫說逆流工補腦  
眼碧那憂散黑花髮白故應還翠葆賈傳只嫌松醪陋  
劉隋敢誇桑落好直須五斗論解醒寧待三杯乃通道  
誰知萬里落旄人亦許飽尊自傾倒為君喚迴雪窖春  
八載羈愁供一掃曼倩宜分此日桃安期莫詫他年棗  
何煩更採石斛花已覺容顏不枯槁根連石室喜入夢  
句擬桐溪媿摘藻平生我亦愛書札朱髓綠腸勤探討

幸君汲引成此志  
鶴駕駸駸望仙島  
吞腥啄腐非夙心  
歲晚茲言良可保

曹勛

過淮值雨偶成呈王樞密

明日立秋秋色至  
向晚雨隨大風起  
飄盆如麻不足喻  
倒海傾江差可擬  
喬林老木亞復折  
簾幙頽垣紛若委  
須臾霽色上南山  
落日煙雲照淮水

送鄭猷歸福唐

君家有唐第一人耕隱谷口同子真臨安始終三十載  
我亦挂冠君歸閩重話向來倦遊處蒼顏頹髯皆如銀  
喜君南歸不可從雁飛時寄天台春

胡宏

題上封寺

百年身似客浩蕩世間遊入望青山好夢魂偏我留我  
家巫山十二峰浮江直過巴陵東瀟湘水與蒼梧通環  
遶衡嶽青冥中扁舟白雲不可度杖藜蠟屐乘春風山

光浮動可攬結雲舒霞卷飛煙虹深巖大壑翠巘巘足  
力已到心無窮羣峰迤邐勢不競上盡祝融五千仞祝  
融峰高天更高太空人世如牛毛風雲萬變一瞬息紅  
塵奔走真徒勞

同伯氏還鄉

江村沙暖萋萋長味比枸杞新甘香茁茁荻芽生近渚  
紫花臺菜初未嘗白羊烏豕俱在牧茅屋竹籬真故鄉  
人生未必須富貴萬事且願身康強徑買官場舊醅酒

共醉春風殊未央

朱松

宿野人家

夢裏滄波搖一葉覺來正受肩輿兀人家一宿晚可投  
新席檣梧香更滑霜前穉稬收百畝稚子新能牧鵝鴨  
我生本是箇中人挾策久矣猶能說

考亭陳國器以家釀餉吾友人卓民表民表以  
飲予香味色皆清絕不可名狀因為製名曰武

夷仙露仍賦一首

二年飲水閩中村忽見玉體傾蠻尊涓涓醍醐灌熱腦  
耿耿沆瀣明朝暘旱塵久漲城市暗渴夢欲挽江湖吞  
何人遠致雙鯉信知我來扣羅雀門不須邀月已清絕  
尚恐熨齒當微溫要從華池汲真液豈獨玄歸薈愁根  
微芒已識投轄客娥媚似返當壚魂奇功誰續伯倫頌  
妙意要與淵明論胸中我自有涇渭筆下君已傾崑崙  
詩成寄與約他日飲君與我空餅盆

谿南梅花

嶢嶢石徑鳴枯筇意行結曲無西東心知幽壑梅已動  
一枝寄我曾未蒙暗香橫路忽驚顧冰蕊的皪蠻煙中  
有如佳人久去眼邂逅相得情何窮蔬畦壓霜翠羽亂  
已覺雪片棲丰茸嗟吾幸此來已晚攀條嚼蕊聊從容  
玉仙遊戲下塵世絕艷一洗朱鉛空不知閨苑在何許  
叱回風馭無怱怱溪寒沙淨迷俯仰坐待山月來朦朧  
豈無尊酒相煖熱錦裘起舞如驚鴻仇池老仙羽化久

妙曲三疊餘仙風歸時醉倒不知和明日來此誰能同  
答林康民見和梅花詩

寒崦人家碧谿尾一樹江梅卧清泚仙姿不受肉眼汙  
風斂天香瘴煙裏向來休沐得無事誰從我遊二三子  
彎碕曲徑一攜手凍雀驚飛亂英委班荆勸客小延佇  
酌酒賦詩相料理多情入骨憐風味依倚橫斜嚼冰蕊  
至今清夢挂殘月強作短歌傳衰齒韻高常恨句難稱  
賴有君詩清且美天涯歲晚感鄉物歸歟何時路千里



柁樓一笛雪漫空回首江皋淚如洗

朱槔

次韻梅花

陰陰雪意雲垂地曳策微行傍清泚眼明橫路出江梅  
煙暝沙寒迷表裏當年一夢山月明依約瑤臺見仙子  
俗緣掣肘意未了弄出飛瓊亂紛委摩挲銅狄豈須話  
滄海揚塵固其理花神縱步來閨苑羞怕唐昌偷玉蕊  
回風自作妝半面泣露真成愁齟齬相看一笑豈易得

分與天香更清美那知脫屣塵寰去頃刻蓬萊三萬里  
黃昏誰伴醉鄉歸天色無情澹如洗

鄭剛中

寒食

江鄉時節逢寒食花落未將春減色嶺南能有幾多花  
寒食臨之埽春跡花多花少非我事春去春來亦堪惜  
柴門風雨小庭寒無奈池塘煙草碧欲將詩句慰窮愁  
眼中萬象皆相識欣然應接已無暇都為老來無筆力

夜聞雨聲賦古風時趙使君祈雨之翼日也

山齋道人夢魂清夢中細響忽可聽  
三峽流泉出幽隱  
萬蠶食此春葉聲又疑相如夜病渴  
蟹眼亂沸石鼎鳴  
呼童起視果安在云是西簷甘雨傾  
於時火流祇三日  
田兆正作龜縱橫昨朝太守拜壇下  
五龍奉命雲雷驚  
小兒放散蜥蜴去神鼓罷擊巫舞停  
田翁翻溝出賸水  
婦子田邊笑相迎商量今歲多釀酒  
是間指日當雲平  
山齋一飽想無慮摩腹卧看秋風生

寄贈張叔靖

堂堂張侯好睂宇照人冰玉無塵土憶初邂逅共杯盤  
姓字未通心已許參商別後各天涯屈指流年不勝數  
何如策馬忽東來扣我柴扉敘寒暑相親顏色愈敷腴  
不俗胸懷細傾吐使人頻歲飢渴心如飲甘泉餉暇補  
吾生寒苦衆所知眼高無人人不與技窮漸覺蒲柳衰  
進取一途方首鼠有心斲土治田園束手抽身事農圃  
荷鋤今亦粗成趣頗有嘉蔬待春雨所恨松根長茯苓

僻寂無人堪共煮安得溪霜素月高促膝與公長夜語  
宣和壬寅仲冬二十六日留別臨川陳泰穎

江南浙東千里遙雁聚沙汀無定跡偶然握手如平生  
祇恐前身已相識不然安得一羈旅披露煩君出金石  
我今漂泊又西去草草分衿實堪惜孤舟漾水如輕葉  
何處煙村倚灘磧明朝橫枕清浪頭夢破霜風正相憶  
張綱

次韻王子飛跋石曼卿洛中題壁

酒狂翫世芙蓉仙胸中落落太古全浮雲富貴不著眼  
肯復騰上誇鳶肩應怪元龍負豪氣獻書天子言十事  
騎驪一去不可追風月淒涼壁間字

壽燭

代人上鄭相生日三首錄一首

凝香紅燭大如椽華堂兩兩排金蓮漏澀銅壺寒夜永  
光搖翠幄爭春妍蘭膏芳苾何足道簾捲香風碧煙裊  
霜娥勿用拂麟鬚合就仙丹會難老我公身依日月光  
不假仙丹亦壽康煌煌神燭照天下光焰何止萬丈長

世間燭火知無助想像丹輝爭欲賦可憐賤士老不才  
短檠見跋無佳句

次韻酬彥達

浮榮過眼風脫葉鴛行無復清夢接柴門晝閉雀可羅  
寒日暉暉弄疎樾已種芳蘭滋九畹更遣胎仙舞三疊  
李侯壯志亦可人舉目萬里欲橫絕醉眼時看石稜紫  
吟髯半作霜棘折方今聖主躬儉勤奏賦不須誇羽獵  
中興盛事要磨厓老於文字誰踰結願君勉力上扶搖

渺渺雲海出飛楫莫隨鍛翮卧窮巷漫學啼蜚吊寒月  
次韻彥達對雪有感

朔風卷地寒雲繁忽驚空花隨簷間遠山歷亂眼中失  
飛鳥滅沒天際還緬想端門萬官賀雲陛儼列鳴珮環  
豐年獻瑞天一笑聲動四海俱歡顏李侯人物妙天下  
何獨卧窮看屋山胸次冰壺自深瑩管中霧豹難窺斑  
異時富貴恐不免詎忍空歌梁甫艱君看鴻鵠有高志  
一舉九萬誰能攀



劉子翬

詩寄嬾翁兼簡士特溫其原仲致中昆季

嬾翁疎散無與儔結菴名嬾山之幽蕭然杖屨巖壑裏  
似是當年嵇阮流云何出處戾初志束書負劒俄西流  
悲猿攀車鶴卧轍去意勇決誰能留菴隨鐵鎖人跡斷  
破窗鳴紙風颼颼曳裾我昔翁門客豈知繼踵居翁室  
里間應記往還頻猿鶴乍驚賓主易爾來庭戶已更創  
尚榜翁名志陳迹傍菴小樹昔親栽鑿沼今遷在簷北

我山亭闕舊牆東此景新成翁未識遙知捧檄遵歸途  
摘山官況今何如書來頗厭作吏冗俸祿僅可供妻孥  
趨庭日一見官長脚靴手板常睚眦簿書有程那得懶  
却視故隱真濂廬寄聲頻慰吾人望往時交友皆無恙  
鷺峰諸劉更互來清湖居士時相訪中郎司戶又繼歸  
酒社文盟氣增壯我慚淺拙難強陪每憶翁才真輩行  
拂衣早赴竹林期莫遣移文重前謗

贈宋周賓

我車南君車北相逢總是天涯客  
擁爐談笑一燈殘出門風雨千山隔

次韻蔡學士梅詩

梅梢破白香清切冷雨含春不成雪  
瑤池髣髴萬妃遊縞裙練帨何鮮潔  
凌晨燦爛忽驚眼客中又過嘉平月  
年年見梅非昔地海角尋芳更愁絕  
多情欲伴曉雲飛有恨只教啼鳥說  
兵廚況是酒如澠東閭喜聽談吐屑  
飄零使我歡意盡山城暮角聲嗚咽  
庭邊一樹春最晚

老三十一  
照影遙憐水方折暫忙不到今幾時南北枝頭開又歇  
新詞婉媚發春妍未害廣平心似鐵

黯淡灘

南來甌粵無平陸林巒起翠波騰綠扶輿政恐犯霜露  
買舟尚可休僮僕清灘白晝雷霆作亂石驚湍犬牙錯  
平生珍重千金軀舟子一篙那可託飄搖葉樣勢轉急  
釜竈傾顛不能立眼看白浪散銀山蛟螭百怪堂堂出  
人皆乘險欲趨利我不安行悔何及吁嗟世路風波猛

巧弄危機暗馳騁

羅願

和汪伯虞求酒

君不見菊潭之水飲可仙  
酒旗五星空在天  
此江縠紋奇更絕  
投以麴米清如泉  
分甘正擬供低唱  
要築糟臺須大匠  
詩人便欲醉千日  
歡伯僅堪陪一餉  
曰予此樂未之知  
獨愛為餅居井湄  
因君飲興亦浩蕩  
夢隨驂駕觴瑤池  
昔賢酒盡孤長吸  
大似竹枯還欲瀝  
明朝秀句

傳滿城笑指空樽卧牆壁

鄭樵

穀城山松隱巖

青嶂廻環畫屏倚晴窗倒入春湖水  
村村叢樹綠於藍  
列列行人去如蟻新秧未插水田平  
高低隴麥相縱橫  
黃昏倦客忘歸去孤月亭亭雲外生

蘇籀

遊鼓山

孫子安  
見招

呼船起柂乘潮平掠窗飄箔疎雨傾漱石枕流東道主  
櫛風沐雨吾曹行百尋懸瀑瀉紳珮兩邊喬木翔杆薨  
乞漿滿甌牛乳粥縱橫下筋馳蹠羹躋摩頂踵歷蹬術  
牽挽葛藟披榛荆荒浪攬差復罨靄截薛扇顛仍峻嶒  
嗥煙嘯雨猿鶴宅絕山航海樵漁能草衣穴處避世士  
木食澗飲安禪僧芝房雲閣無盡藏月屏風幌長明燈  
笑看闌闌一蟻垤揮斥氛侵投蠻藤經行石竇解滕僞  
飲灌匏杓談淄澠莫嗔踏碎蒼苔色莫嫌汲濁陰井清

膏盲泉石有鑒裁騰蹕巖嶠試股肱要識石鼓真面目  
立置枕几非繪繒風吹楊葉此山下欲問故老知誰磨  
市朝一夢爭奪際山海蕭散堪伏膺

王鉉

明覺山中始見梅花戲呈妙明老

急晷馳輪歲將歇我更荒村轉冰轍凝嚴萬物凍無姿  
水墨陂塘葭葦折是誰背向此間來破萼梅花伴幽絕  
遙山誰恨天作愁澹畫睂峰半明滅清香自滿不因風



玉色素高非鬪雪竹籬凝睇一淒涼沙水澄鮮兩明潔  
天仙謫自廣寒宮定與桂娥新作別尚憐嬾獨各相望  
多情與照黃昏月從來耐冷月中人一任北風吹石裂  
漫勞粉鏡學妝遲欲寫冰膚畫工拙千古無人識歲寒  
獨有廣平心似鐵我因花意拂埃塵尚恐人傳向城闕  
詩成火暖夜堂深地爐細與山僧說

皮日休曰宋廣平鐵心石腸乃作梅

花賦有徐庾風格予謂梅花高絕  
非廣平一等人物不足以賦詠

# 范浚

同伯通端杲姪效盧全體

一春癡癖門長扃兩耳不聞鶡鴒聲不知東南風埽盡  
紅紫英行行點檢桃李徑但見樹子青冥冥門前水流  
渠照灼須眉清蝌蚪游其間脚股各已生渠傍草鬱鬱  
草底蚯蚓鳴韻如抽繭絲幽咽得我聽念此瑣細物隨  
時變音形黃河赤鯉或點額老驥塞默長羈纓嗟嗟世  
路真難行

郊行探春得梅林琴翫為樂因成詩示偕行

公不見白衣居士春風裏浪走尋芳南澗底要見深紅  
躑躅花不辭辛苦行三里吾人風味復不惡異代幽情  
敢相擬故穿密竹過山腰却下橫橋度沙嘴寧甘著脚  
踏殘雪正欲搜春訪桃李天寒桃李都未花只有山梅  
破紅蕊低歌巖石俯蒼翠倒影方塘照清泚臨風三嗅  
忍回頭細看長吟聊徙倚賞花及此當作意歸把疎香  
汎浮蟻莫令漂落亂飛空惆悵殘英隨隴水

同茂通弟效溫飛卿體

海棠紅歇鶯停歌  
麥風時候猶清和  
簾垂眾穀深院靜  
赤欄細柳陰婆娑  
池塘正覺幽事好  
萍葉藻蔓涵清波  
一雙胡燕薇叢外  
銜得芹泥來補窠

贈青城道人

道人來自青城巔  
飄飄逸氣凌雲煙  
青鞋布襪久遊世  
踏盡海宇名山川  
琴心三疊得妙旨  
華頂一路通幽禪  
自言早歲拾瑤草  
往往鶴上逢真仙  
惜哉食服只半劑  
猶與世人相周旋  
曾期汗漫九垓外  
決去已復揮騾鞭

伊予此生一念誤遂隨塵網嗟拘攣鏡中華髮已疎索  
肘後丹經猶棄捐三山銀闕渺何許悵望碧波翻天  
因君告我獨往意技癢踈踈心茫然萬言得道兩塵隔  
蓬島只在拄杖前定知後會君刮眼看我玉練還顏年

理喻

郵亭羈客寒無氈夜懷家山情惘然燈前坐感雨蕭瑟  
浩歎達曉愁無眠鄰翁不出蓬茨裏聽雨聽風心似水  
黃昏鼻息已雷鳴往往簷喧不經耳愁霖一種聲紛紛

鄰翁不聞羈客聞是中轉物有妙理起余暗契漆園旨  
春融融效李長吉體

天暄地媚春融融化工點染分花容東風夜半入香陌  
雜樹曉繁爭白紅蘭叢蕙根芳翠滴柳豔明眉輕幕歷  
紅顏綠鬢青春客壺中新醅鴨頭色殘絲冉冉惹愁如織  
日暮低迷草萋碧

周必大

送光祿寺丞李德遠請養祠

君家臨川我廬陵兩郡相望宜相親  
長安城中初結綬石灰橋畔還卜鄰  
扣門問道日不足篝燈照夜論心曲  
寸莛却許撞洪鐘跛鼃近將隨驥驟  
聞君上書苦求歸君今豈是當歸時  
滿朝留君君不顧我雖歎息何能為  
莫攀楊柳濤江岸莫唱陽關動淒斷  
行行但祝加餐飯潮落風生牢繫纜

韓子溫尚書以長句送江梅次韻

憶昔歸田友麋鹿雪裏尋梅踏瑤玉  
巡簷屢作杜陵笑

窮路幾為步兵哭，忽逢綠衣騎如雲。  
歌舞醉人睡昏昏，覺來但有風相襲。  
夢斷初無香返魂，豈知重見長安雪。  
喜極豐年簫鼓咽，更讀裴公東閣詩。  
仍分處士西湖月，皎如玉樹臨我旁。  
幸同待漏靴滿霜，但願和羹繼先業。  
不辭草制搜枯腸，來辭有和羹之句

曾無疑以長韻送金橘時已暮春次韻

荼蘼殿春枝滿霜，盧橘熟夏今。  
乃黃彈丸煌煌照坐光，老叟驚詫見未嘗。  
客言采果孟冬月，剖竹為符帶霜雪。



包之赫蹏滿貯中纏以絲泉外合節或藏綠豆飲醉翁  
或雜寸槁仍緘封三說未識將誰從但覺色香新摘同  
分甘安能與衆樂秘方何惜都傳却已誇指下石化金  
仙指併求君勿噓


御選宋詩卷三十一

謹案卷三十第十一頁前七行橋下連橋南與北  
刊本橋訛牆據張耒宛丘集改

第十二頁前四行裸股掣肘時謹爭刊本謹訛誰  
據張耒宛丘集改

卷三十一頁十七頁後六行意雖欲往無由行刊  
本雖欲訛欲雖今改





總校官庶吉士臣侍 朝  
校對官檢討臣蕭九成  
膳錄舉人臣李 駟